

De Palm Island a celebra su 20 aniversario cu hopi estilo y alegria




ORANJESTAD – Diaranzon anochi gerencia di De Palm Island a invita un cantidad grandi di su socionan comercial, lidernan di diferente sector publico y priva como tambe media na un fiesta fabuloso cu motibo di nan dos decada di existencia. E evento cu a tuma lugar, na ki mihor lugar, cu riba De Palm Island, tabata un produccion di un calidad

hopi halto. Henter anochi ferryman a keda trece invitadonan pa e isla for di e dock y tabatin un tapijt corra y koor ta warda riba nan pa haya un estupendo bon-bini. Despues di haya un cocktail invitadonan tabata drenta den un ambiente maravioso estilo Marocano cu hopi briyo, musica y magia den aire. Fernando Mansur y su ekipo tabata esnan



responsable di a comberti un di e beachnan di e isla den un mundo apart pa e anochi aki. E ambiente tabata inclui modelonan disfraz di entre otro sirena. E diferente servicio y atraccionnan obtenibel riba De Palm Island, como por ehempel tratamentonan di spa y Sea Trek a keda ilustra di un

manera interactivo na cada un di e diferente hutnan riba beach. Di nan banda e compania di catering Taste of Belgium a ofrece e anochi aki un fiesta di smaknan tanto na e buffet instala den e restaurant como tambe cu e diferente pasobocanan cu a inclui salmon wraps y sushi. Pa esnan buscando



algo sucu, tabatin un hut caminda invitadonan por a saborea un dushi ijs cream of diferente fruta y bolo den forma di fondue. Ora cu e parti oficial a inicia, gerencia di De Palm Tours a hiba palabranan di danki. Sr. Hareld Malmberg brevemente a expresa loke tabata su vision y e experiencia durante e ultimo 20 aña y mescos a hiba palabra su yiunan Lisette y Ricardo. Di parti di Gobierno a subi escenario Minister di Turismo y Transport, Sr. Edison Briesen mientras cu den representacion di e

sector turistico a papia Sr. Rob Smith como director di AHATA. Despues a sigui un parti mas informal cu musica en bibo di banda cu cantantenan Jairo y Lucre como tambe

un desfile di moda enfoca riba, naturalmente traha di baño y paña di lama. Esaki ta djis algun di e momentonan principal cu fotografonan di Bon Dia Aruba a capta durante e anochi bunita aki.

